

欽定大清會典事例

卷四百九十四

五十四

禮部

喪禮

欽定大清會典事例卷四百九十四

禮部

喪禮

孝哲毅皇后大喪儀

孝哲毅皇后大喪儀。光緒元年二月二十日。

孝哲毅皇后崩。○欽奉

慈安端裕康慶皇太后

慈禧端佑康頤皇太后懿旨。嘉順皇后孝敬性成。溫恭夙著。茲於本日寅刻遽爾崩逝。距大行皇帝大喪未逾百日。復遭此變。痛何可言。著於壽康宮行斂奠禮。擇期移至永思殿暫安。所有一切事宜。並派恭親王

奕訢會同恭理喪儀王大臣暨各衙門查照例案。隨時妥籌具奏。○又

諭派禮親王世鐸。禮部尚書萬青藜。總管內務府大臣魁齡。工部右侍郎桂清。恭理喪儀。○又奏准。初喪治喪事宜服色。一。初喪日。

皇帝率王公百官咸成服二十七日。惟現在

大行皇帝喪服百日內。應請

皇帝毋庸另行成服。一。

內庭主位等成服十三日而除。一。

大行嘉順皇后宮內女子內監。翦髮截辮成服百日。一。

內鑾儀衛設

儀駕於

壽康宮門外。工部設引旛於

壽康宮門外之右。設九龍帳幔及兩旁白綾帷幔於殿

內。一。親王以下有頂戴官員以上及三旗內務

府官員等。均先摘冠纓齊集。公主親王福晉以

下。鄉君奉恩將軍恭人以上。民公夫人以下。二

品命婦以上及三旗內務府命婦婦人等。均先

去首飾齊集。其

內庭主位等俱在

几筵前齊集。一。恭理喪儀王大臣並

殯宮守衛執事暨

大行嘉順皇后姻戚。均百日除服。一。王以下奉恩將軍以上。民公侯伯以下。有頂戴官員等以上。各給白布成服。罷斥及閒散宗室覺羅亦准成服。二十七日而除。均百日內不薙髮。一。公主福晉以下。鄉君奉恩將軍恭人以上。民公侯伯一品夫人以下。侍郎男夫人以上。及三旗內務府之命婦。婦人等。咸令成服。二十七日而除。一。外藩額駙王公台吉。公主福晉郡主等。於服內來京者。

亦令成服。

堂子官吏。

神殿執事官員男婦內監。

壇

廟

奉先殿官員內監。

陵寢官員內監出征將軍以下兵丁以上妻子漢官命

婦皆停給孝服軍前不摘冠纓本家現有出痘

及父母親喪人等暫停給孝服。九日內不辦

事。十三日內各衙門恭呈

皇太后奏疏。仍用硃印。其餘奏疏文移。俱用藍印。一王

公大臣等。十三日內。朝晡二次奠獻。齊集舉哀。十三日後。每朝奠齊集一次。二十七日後停止。遇祭仍齊集。公主福晉以下。男夫人以上。三日內。每日二次齊集。第四日朝奠時齊集。初祭後停止。遇祭仍齊集。內務府佐領內管領下官員。護軍領催等之妻。三日內。每日朝晡奠二次。齊集舉哀。三日後。每日以一旗輪流齊集。一。二十七日內。王公各於該府第齋宿。部院堂司官於各該部院。各旗都統參領佐領及散秩官於本

旗衙門齋宿。一在京軍民人等。咸於七日內男摘冠纓女摘耳環。一月後薙髮。其在京旗人。仍百日後薙髮。○又奏行斂奠禮。所司於

壽康宮殿內陳設如儀。諸執事咸備。

皇帝出宮至

壽康宮門外降輿。立於殿檐東西嚮舉哀。

內庭宮眷等立於門內。公主近支福晉夫人立於後。王公以下。文武有頂戴官員以上。及三旗內務府官員等於

壽康宮門外兩旁齊集。諸王福晉公夫人以下。二品命

婦鄉君奉恩將軍恭人以上於

壽康宮門內兩旁齊集。三旗內務府之命婦婦人等於
階下兩旁齊集。衆皆舉哀。內務府大臣命婦率
尚茶尚膳女官。由中門入。尚茶女官跪進茶。奠
於案。行一叩禮。

皇帝率王公百官皆北面跪拜興。徹茶。尚膳女官揭
巾幕。上食畢。執事官進奠几。內監跪進爵。

皇帝受爵三奠。每奠行一拜禮。衆隨行禮。徹奠。哀止。
皇帝乘輿還宮。衆各退。本日奉

旨。所有尚茶尚食進爵各事宜。著改在外邊伺候。餘

依議。○二十一日。欽奉

慈安端裕康慶皇太后

慈禧端佑康頤皇太后懿旨。大行嘉順皇后暫安壽康宮。每日朝晡日中三奠。著內庭主位等奠酒行禮。尚茶尚食。著女官承應。執壺盞著太監承應。奉移永思殿後。著崇凱崇勳崇霈葆初克昌等輪流奠酒。○二十五日。以次日

梓宮奉移。遣官於

大行皇帝几筵前。行告祭禮。○是日行啟奠禮。五鼓工部設幕於

壽康宮門外之西。置奠几。陳燎牀於燎所。具楮幣。設祭
文案於殿內稍西。內鑾儀衛官校陳儀仗。內監
設

冠服篚於供牀。恭理喪儀王大臣。內務府大臣率執事
官陳果筵於

几筵前。列饌筵於階下兩旁。羊酒於幕內。讀祝官奉祭
文。禮部堂官二人前引。由中門入。陳於案出。王
公百官等各辨位集俟。辰時。

皇帝詣

几筵前。東立。西嚮。舉哀。內外齊集者咸舉哀。尚茶跪進。

茶。衆皆跪。

皇帝舉茶奠於案。行一拜禮。衆隨行禮。尚茶徹茶。次尚膳進膳。揭巾冪。

皇帝上食畢。讀祝官奉祭文於案左跪。禮部堂官二人左右跪。恭展祭文。執事官進奠几。

皇帝跪。衆皆跪。哀暫止。讀文畢。復於案退。舉哀如初。奉爵大臣跪進爵。

皇帝祭酒三爵。每祭一拜興。衆隨叩興。

皇帝復位。乃徹饌。讀祝官奉祭文。禮部堂官前引。由中門出。送至燎所。內監恭請。

冠服篚。宮殿監侍二人前引。由中門出。

皇帝豫出殿門。

冠服至。

皇帝跪。候過興。還宮。

冠服由中門出。齊集者咸跪。候過興。皆退避。福晉命婦咸出隨行。至楮堆處。俟。

冠服恭安於燎位畢。祭酒之福晉等於燎所跪。女官遞酒杯。祭酒三爵。每奠行一叩禮。衆隨行禮。跪舉哀。哀止興。各退。○二十六日卯時。

梓宮奉移

永思殿殯宮。工部內務府將黃幔素帷及供牀几案五供把蓮等項。豫先徹出。送往

殯宮陳設。工部備大昇輦及小輦於門外。上駟院備馬四十八匹。駝包十八副。鑾儀衛儀仗全設。工部設

冊

寶綵亭。恭昇

梓宮夫役等共分六班。班各八十人。每班外各備八人。初班末班用校尉。中四班用民夫。均衣駕衣。分班立俟。屆時。

皇帝詣

梓宮前舉哀。執事官進奠几。

皇帝祭酒三爵。每祭行一拜禮興。退至檻外東旁立。
禮部內務府大臣恭奉

冊

寶。陳於綵亭內。校尉舁行。執事官校進小輦。恭奉
梓宮啟行。

皇帝於

壽康宮丹陛上西嚮跪。舉哀候過興。豫往

永思殿祇俟。

內庭宮眷亦由

神武門豫往祇俟。

梓宮登大昇輦。禮部堂官祭輦。奠酒三爵。行三叩禮。衆隨行禮畢。焚楮錢。校尉昇行。

冊

寶亭及

儀駕前導。恭理喪儀王大臣。禮部工部內務府堂官暨王貝勒等兩旁隨行。包衣佐領管領下派婦女一百八十名。乘馬隨行。太監十八名。沿途照料行走。其次豹尾槍隨行。所有應行齊集人

員。王以下至奉恩將軍閒散宗室覺羅等於

西華門外按翼齊集。內務府官員在北池口內齊集。左翼大臣官員等在北長街齊集。右翼大臣官員等在

景山後西北角齊集。漢大臣官員在

景山後東北角齊集。皆候

靈駕至。舉哀跪迎。候過隨行。恭昇

梓宮人夫頭目四人。服喪服。擊響尺。每班派公侯伯頭等侍衛以下。參領輕車都尉以上。並給事中御史郎中員外郎等官四員。照看管轄。派鑾儀衛